

- जम्मू कश्मीर रा पहलगाम मांय व्ह्या आतंकी हमला पाछे और विचार सारू प्रधानमंत्री नरेन्द्र मोदी री सदरत मांय नई दिल्ली मांय आला दर्जा री मीटिंग।
- केन्द्रीय मंत्री मनोहर लाल खट्टर जयपुर मांय मुख्यमंत्री भजन लाल शर्मा सागे राज्य मांय शहरी विकास अर ऊर्जा हलका ऊं जुड़ी योजनावां रो जायजो लीनो।
- प्रदेश मांय सरकारी महकमां री कुछ वेबसाइटां पाकिस्तानी हैकर्स हैक कीनी-शिक्षा मंत्री मदन दिलावर कह्यो-मामला री जांच करायी जा रही है।
- राज्य मांय कठे-कठे काल ई ज़ोरदार गर्मी रा आसार-एक मई ऊं आंधी-बारिश री संभावना।

000

जम्मू कश्मीर रा पहलगाम मांय लारला दिना व्ह्या आतंकी हमला पाछे हालात रा बारा मांय विचार सारू आज प्रधानमंत्री नरेन्द्र मोदी री सदरत मांय नई दिल्ली मांय आला दर्जा री मीटिंग व्हे रही है। इण मांय रक्षा मंत्री राजनाथ सिंह, राष्ट्रीय सुरक्षा सलाहकार अजीत डोभाल, रक्षा प्रमुख अनिल चौहान अर फौज रा तीन ई अंगां रा अध्यक्ष ई मौजूद है।

000

प्रधानमंत्री नरेन्द्र मोदी कह्यो है के केन्द्र सरकार देश री शिक्षा व्यवस्था ने नुवी बणा रही है। श्री मोदी आज नई दिल्ली मांय राखी ज्या खास नीतिगत सम्मेलन युग्म मांय बोल रह्या हा। वे कह्यो के विद्यार्थियां सारू विश्व स्तर रो ज्ञान हासिल करणो आसान बणायो जा रह्यो है। प्रधानमंत्री कह्यो के नौजवानां रो भविष्य बणावण मांय शिक्षा नीति रो मोटो काम व्हे है। श्री मोदी कह्यो के युग्म कॉन्क्लेव ऊं भारत रा भांत-भांत री नुवी खोज करण रा बूता ने ताकत मिलेला। प्रधानमंत्री कह्यो के टेलेट, टेम्परामेंट अर टेक्नॉलाजी भारत रा भविष्य ने ट्रांसफॉर्म करेला। वे कह्या के देश ने प्रौद्योगिकी रा हर हलका मांय बेहतरीन बणावण री दिशा मांय काम कर्यो जा रह्यो है।

.....

ई सम्मेलन रो मकसद देश मांय नवाचार रा हलका मांय मोटा पैमाना माथे गैर-सरकारी निवेश ने बधावो देवण अर तकनीक मांय अनुसंधान ऊं तेजी लावणो है।

000

केन्द्रीय मंत्री मनोहर लाल खट्टर आज जयपुर मांय मुख्यमंत्री भजन लाल शर्मा सागे राज्य मांय शहरी विकास अर ऊर्जा हलका री योजनावां रा तैत कराया जा रह्या कामां रो जायजो लीनो। मीटिंग मांय केन्द्र अर राज्य सरकार रा आला अहलकार ई मौजूद रह्या। मीटिंग मांय मुख्यमंत्री प्रदेश मांय बिजली तंत्र ने मजबूत करण अर बिजली री जरूरी पूर्ति सारू उत्पादन इकाइयां अर प्रसारण तंत्र रो रख-रखाव तैय करण री जरूरत बतायी। श्री शर्मा कह्यो के राज्य सरकार किसानां ने खेती-बाड़ी सारू दिन मांय ई बिजली मुहैया करावण रो लक्ष्य साल 2027 ताई हासिल करण सारू काम कर रही है। मुख्यमंत्री कह्यो के शहरी बुनियादी ढांचा ने मजबूत बणावण रा काम मांय ई केन्द्र सरकार ऊं पूरी मदद मिल रही है। श्री शर्मा केन्द्रीय मंत्री श्री खट्टर सागे स्वच्छ भारत मिशन, ई-बस सेवा, जयपुर मेट्रो रेल, अमृत मिशन 2.0 अर प्रधानमंत्री आवास योजना समेत विकास री न्यारी-न्यारी योजनावां ने आगे बधावण अर वां रा माली मॉडल रा बारा मांय ई चर्चा कीनी। मीटिंग मांय श्री खट्टर कह्यो के राजस्थान अक्षय ऊर्जा रा हलका मांय अगाड़ी है। ई दौरान ऊर्जा हलका मांय उत्पादन, वितरण अर ट्रांसमिशन सिस्टम ने मजबूत बणावण री रणनीति माथे ई विचार करी ज्यो। वे राज्य मांय पी.एम.

कुसुम योजना रा तहत कर्या जा रह्या काम री ई सराहवणा कीनी। मीटिंग पाछे दिल्ली जाती बगत हवाई अड्डा माथे खबरनवीसा सागे बातचीत करता थकां श्री खट्टर पहलगाम आतंकी हमला रा बारा मांय कह्यो के एड़ी वारदातां ओजू व्हेवण ऊं रोकण सारु करड़ा कदम उठाया जावेला।

000

प्रदेश मांय सरकारी महकमां री कुछ वेबसाइटां ने पाकिस्तानी हैकर्स हैक कर लीनी। शिक्षा विभाग, जयपुर विकास प्राधिकरण अर स्वायत्त शासन विभाग री आधिकारिक वेबसाइट हैक कर्यां पाछे साइबर हमलावर आं साइटां माथे पहलगाम आतंकी हमला रो जिक्र करता थकां आपत्ति लायक सामग्री डाली। शिक्षा मंत्री मदन दिलावर कानी ऊं तुरत कार्यवाही पाछे वेबसाइट अस्थायी तौर ऊं बंद कर दीरीजी है अर इण माथे मुहैया करायी ज्यो सरकारी जाणकारियां पाछी हासिल करण रो काम तेजी ऊं कर्यो जा रह्यो है। विभाग साइबर सुरक्षा एजेंसियां ने ई इण री जाणकारी दीनी है अर इण री जांच सुरु कर दीरीजी है। जांच मांय ई साइबर हमला रा जिम्मेदारां री पिछाण री कोशिश करी जा रही है। शिक्षा मंत्री कह्यो के कोई संवेदनशील जाणकारियां लीक व्हेवण री फिलहाल पुष्टि नी व्ही है पण एहतियातन सगळा सिस्टम्स री जांच करवाई जा रही है।

000

उपमुख्यमंत्री दीया कुमारी आज झुन्झुनू जिला रा दोरासर गांव री सैनिक स्कूल मांय नुवो बनायी ज्यो लड़कियां रो छात्रावास जनता ने सूंप्यो। ई मौके उपमुख्यमंत्री टबरियां सागे बातचीत ई कीनी। ई पाछे दीया कुमारी शौर्य उद्यान रो दौरा कीनी। खबरनवीसां सागे बातचीत करता थकां वे कह्यो के शौर्य उद्यान ने ओजू बनायो जावेला ताकि वीर फौजियां अर शहीदां री यादां सहेज र राखी जा सके।

उपमुख्यमंत्री कह्यो के शेखावाटी हलका री हवेलियां ने बचा र राखण री योजना बनायी जा रही है।

000

कैबिनेट मंत्री जोराराम कुमावत आज पाली कने तखतगढ़ मांय तळाव ने और बेहतर बनावण अर नगर पालिका री ओर ऊं कराया जावण वाळा विकास रा कामां रो जायजो लीनी। वे जन सुणवाई ई कीनी।

000

विधानसभा मांय सरकारी मुख्य सचेतक जोगेश्वर गर्ग आज जालौर मांय अमृत 2.0 रा तैत सुन्देलाव तळाव रो विकास करण ऊं जुड़्या कामां री नींव रखी। आं कामां माथे करीब एक करोड 96 लाख रुपया रो खर्चो आवेला। ई मौके श्री गर्ग कह्यो के सुन्देलाव तळाव ऐतिहासिक अर धार्मिक ठौड़ है, जिण ने रुपाळो अर साफ बनायो राखण री सगळां री जिम्मेदारी है।

000

काल आखा तीज रे मौके उत्तराखंड मांय गंगोत्री अर यमुनोत्री धाम रा कपाट जातरुआं सारु खोल दिया जावेला। ई सागे ही ई साल री चारधाम यात्रा आधिकारिक तौर ऊं सुरु व्हे जावेला। ई सारु जातरुआं मांय उमाव निजर आ रह्यो है अर आज ऊं ही मोटी तादाद मांय जातरु पूगण लाग्या है। ध्यानजोग है के दो मई ने केदारनाथ अर चार मई ने बदरीनाथ धाम रा कपाट ई खोल दिया जावेला।

000

शस्त्र अर शास्त्रां रा दिव्य ज्ञान सारु पूजा जावण वाळा भगवान परशुराम री जयंती आज मनाई जा रही है। ई मौके न्यारा-न्यारा कार्यक्रम राख्या जा रह्या है। विधानसभा अध्यक्ष वासुदेव देवनानी अजमेर मांय भगवान परशुराम रो अभिषेक कर र प्रसाद बांट्यो। हनुमानगढ़, सिरोही, जयपुर अर पाली समेत न्यारी-न्यारी ठौड़ां शोभा यात्रावां अर वाहन रैलियां निकाली जा रही है। काल आखा तीज मणायी जावेला। ई अबूझ सावा रे मौके मोटी तादाद मांय ब्याह अर दूजा मांगलिक काम व्हेला।

ई बीच बाळक जोड़ां रा ब्याह री शंका ने ध्यान राखता थकां प्रशासन पूरी सावचेती राख रह्यो है अर जिला स्तर माथे कन्ट्रोल रूम बणायी ज्या है।

000

राज्य रा आतूणी हलकां मांय आवता दो दिन ताई ज़ोरदार गर्मी रो असर रहवण री संभावना है। ई बीचे आज प्रदेश रा ऊगणी अर आतूणी हलकां मांय लू बाजण सागे ज़ोरदार तावड़ो पड़्यो। लारला चौबीस घंटां मांय बाड़मेर अर जैसलमेर मांय अधिकतम तापमान 46 डिग्री सेल्सियस ने पार कर ग्यो। जोधपुर, फलौदी, कोटा अर वनस्थली समेत केई ठौड़ां पारो 44 डिग्री सेल्सियस ऊं बत्तो दर्ज करी ज्यो। मौसम केन्द्र जयपुर रा निदेशक राधेश्याम शर्मा बतायो के एक ऊं 7 मई बीचे राज्य मांय आंधी-बारिश ऊं जुड़ी हलचल सरु व्हेवण रा आसार है।

000

नागौर रा स्थापना दिवस री पैली वाळी सिंज्या आज शहर मांय सांस्कृतिक कार्यक्रम राख्यो जा रह्यो है। जिला प्रशासन अर नगर परिषद् री ओर ऊं राख्या जा रह्या ई कार्यक्रम मांय बॉलीवुड रा अर राजस्थानी लोक कलाकार कार्यक्रम पेश कर रह्या है।

000